



UPA 2019/12

30.04.2019

Múte Bourup Egede

2020-mi akileraarutitigut ilanngaatisat il.il. imatut angissusilerneqarnissaannik Inatsisartut aalajangiiffigisassaattut siunnersuut:

- 1. Inummut ilanngaat.....kr. 48.000 (ukiumut)**
- 2. Ilangaat aalajangersimasoq.....kr. 10.000 (ukiumut)**
- 3. Aningaasarsiat B-t akileraaruteqaataasussaangitsut.....kr. 5.000 (ukiumut)**
- 4. Killilimmik akileraartussaataasunut ilanngaat.....kr. 1.000 (ukiumut)**
- 5. Kommuninut ataatsimut akileraarut.....6%**

(Aningaasaqarnermut Nunanilu Avannarlerni Suleqatigiinnermut Naalakkersuisoq)

Aatsaangooq taamak nunarput aningaasarsiorluartigaaq. Suliffissaaleqisut appariartuinnarput. Nunarput aatsaat taamak ingerlalluartigaaq. Ilaatigut taakkuupput piffissami kingullermi Naalakkersuisut oqariartuutigeqattaagaat. Assiliarli kusassarniaraluaanniluunniit piviusoq aamma oqaluttuarisariaqarpoq.

Inuiaat kalaallit atukkamik nalogiinginnerat qaffakkiartuinnarpoq. Peqarluareersut pinikkaluttuinnartut, sulisartukut – Isertitakinnerit akunnattumillu isertitallit ulluinnarni inuuniapiloorput. Kivitseqataapput, nunarput napatippaat, iluaqutissinneqarniartulli Naalakkersuinikkut tassatuaasorinarput peqareersut.

Innuttaasut ulluinnarni atukkatik naammagiunnaarlugit oqariartoqattaarput. Peqqinnissarfimmi sullinneqarnertik naammagiunnaaqqaavaat. Ineqarnikkut atukkatik ullutsinnut naapertuukkunnaartut paasinartumik naammagiunnaaqqaavaat. Toqqissisimaneq ulluinnarnilu atukkamik pitsaanerulernissaannik noqqaanertik tusaaneqanngitsutut misigiffigaat. Illuatungaani suliffeqarfiit aningaasarsiorluarput. Namminersorlutik Oqartussat allaffissornikkut aningaasartuutaat qaffakkiartuinnarput. Naatsumik oqaatigalugu aningaasarsiorneq inuianniit pisortanut suliffeqarfissuarnullu sukkasuumik nuukkiartuinnarpoq, taakku kismik ingerlallualertorput.

Nunarput aatsaat taamak ingerlalluartigippat. Aatsaat taamak aningaasarsiorluartigippat. Taava sooq peqarluareersut - pisortat suliffeqarfissuillu kismik ingerlalluartoqarnera malugissavaat? Oqanngilagut ingerlalluartoqassanngitsooq taanna paatsoorneqassanngilaq.

Angorusukkipununa Kalaallit Nunaat naapertuilluartumik ingerlanneqartoq. Atukkatigut naligiinnginnerup appassinnerpaaffianiitsinneqarnissaa. Nunarput innuttaminut naapertuilluartumik ingerlanneqartoq suleqatigiiffiginiartigu. Sulisartukkut, innuttaasut nunatsinni 75%-ii tikillugit amerlassusillit, ullut tamarluinnaasa pikkorillutik inuiaqatigiinni qimoqataasut atugarissaarnerulernissaat paaseqatigiiffigisigu. Naapertuilluarnerunngilarmi peqarluareersut kisismik, nunarput ilumut taamak ingerlalluartigisimaqippat, siuartiartornissaat.

Nunarput nukittunerulersinniartigu. Ukiuni kingullerni inukilliartorpugut. Neriut inuiannut kalaallinut pigilersinniartigu inuttusiartoqqilerumalluta. Ippassarmiit aqagu atukkagut tamatsinnut pitsaanerulersillugit. Siuariartoraangattalu qulakkeertartigu tamatta naapertuilluartumik peqataatinneqarluta. Ingerlalluarutta tamatta ulluinnarni atukkatsigut iluaqutissilluta.

Inuit Ataqatigiit 2020-mut akileraarutitigut ilanngaatisatut Naalakkersuisut siunnuissaat taamak isikkoqartillugu ilalinngilarput. 2005-imi kingullermik aaqqiissuteqarnermiit ullumikkumut akit qaffakkiartuinnarsimanagerat tunngavitta ilagaat. 2005-imi Siumut Ínuit Ataqatigiillu aaqqissuusseqqissimanagerat nersugassaavoq. Aaqqissuusseqqinnermimi takussutissaqarmat atukkatigut inuiaat kalaallit naligiinnginnerat malunnaatilimmik appariarsimasoq.

Akileraartarnikkut aaqqissuusseqqinneq isertitakinnerit akunnattumillu isertitallit malugilluarsinnaasaat, atukkat naligiinnginnerujussuannik apparsaasoq Inuit Ataqatigiit ujarporparput. Sulinermut ilanngaat aaqqiissutissat ilaattut isigaarput. Angorusutatsinnulli aqutissiuussiviusinnaasut tamaasa oqaloqataaffigalugit suleqataassaagut. Pingaernerutipparput sulisartukkut ulluinnarni atugaasa pitsanngorsaaviginissaat. Assiliaq annerusoq attateeqqat ataasiakkaarlugit aaqpeqattaarnissaanniit suliariumaneroqaarput.

Aap, aningaasanik naleqassaaq. Aallartiffissagissaarpugulli. Naalakkersuisummi uteqattaarpaat aatsaanngooq taamak nunarput aningaasarsiorluartigaaq. Suliffissaaleqisut appariartuinnarput. Suliffeqarfissuit ingerlalluarput. Sulisartukkunnut aningaasarsiorluarnerput malugitilerniartigu. Peqataatinniartigit, massakut pisariaqartippaat. Ullut tamaasa qimoqataallutik nunarput napatitseqataaffigaat. Killormuuanimmi iliuuseqarfiginiangikkaanni naapertuilluarnerunngilaq.